

Ntron Patoé

*Nan, nan, ésseyi pas - ass'moindre què vtron orliè
L'òssè trovâ dé cou - d'nô robâ ntron patoé !...
Pouvre cmè sô roché, rude cmè l'boé d'ses gorlié,
E-t-on bocon de ntra Savoé !...*

*N'tro pâré l'ont parlâ, cmé leu grand, cmé leu pâré,
Et no, su leu ghénoé, à çhà pu, tot ptiolin,
D'ses pé tindrè parole u bin d'ses pé amârè,
On s't'annoncha, saghe u malin...*

*Ah ! d'sé bin qu'al pas fé pè les chusè trop finnè...
Mé qu'des livre al't'ami des dâlié, des çharroui.
Du moins, é va tot dré, é dit tot franc, é brînnè,
Les gônié vâlon rin par lui.*

*Et quin mà vô fâ-t-é ?... Sé ntro ptiou p'les corsirè,
Leu pani à leu bré, le barjaccont ancor,
Diêns lô banc, quand l'régint lé fâ signe pé lirè,
Mé qu'lôs âtre ont i l'soffie cort !*

*Et ntro seudâ... Sé loin, tot u fond de ntra France,
E vg'niont à s'artrovâ et qu'lô mot du pays
Les montêson du cœur p'sé contâ leu s'offrancè,
S'y a fautâ d'leu, s'font-i-preyi ?*

*Poé, s'é s'dévnâve on jheur que d'loé nô l'défindisson
Creyi-ve cm'on agné qu'é laissrè infromâ !
Et n'ara ve rin peû qué ntro monchu sé mtisson
Dé contrebinda à l'amâ ?*

Et dépoé qu'Téta d'Fé, ntron Duc, s'fassivé rindrè
Les vellé, tant et tant d'bràvè ghin dè ntron sang
L'ont amâ et sont môrts... Porâ vo les défindrè
A çlo, d'le parlâ d'l'âtre fianc !

Poé oncor, s'é pové qu'd'on coup é défîn'sézè
Dé tant d'çhusè qu'saront dévg'niu vèvè d'leu nom
Tou qu'vô farâ ? Cmin fodra tou qu'on appalèzè
L'Linchu ? L'Flori ? L'Péle ? L'Borion ?...

Nan, nan, assi lontin qué p'les farmé ntrè villiè,
Sni s'é pè preyi Diu, nè l'vodron pas çhanghi,
Ass'lontin qu'in Savoé é restra na famille
Yeu tô l'am'ron, maitre u barg'hi,

Laissi-no ntron patoé... Ass'lontin qu'lôs ombraghe
Guinglin contrè guinglin, varon lôs amoéreux,
Et les parchèvron s'dire in rizin, u passaghe
Sô mot si rèche, vgniu si deux...

Ass-lontin qu'los grands bù qu'ont l'ârma tant pachinta
Faron leu rê u cri d'Jhouli, Fromint, Allè !
Ass-lontin qu'è restra, par lé, p'los prê in pinta,
Dou vieux u fond d'quaqué çhalé

Qu's'in rappalron... laissi-le... et s'on pouvre, p'les peurté
L'dari dè tos fidèle - in l'rinmalin s'in va,
La ! qu'è poésson tos dou, comm'on croèzu qu's'ameurtè
In paix, tot plian, modâ ava.

Nan, nan, esseyi pas ass'moindre qué vtron orlié
L'ôssé trovâ dé cou - d'nô robâ ntron patoé !
Pouvre cmé sô roché, rude cmé d'boè d'ses gorliè,
Et-on bocon dè ntra Savoé !

Alfred DESSERTAZ.